

遷安縣志卷十

建置志上

城池

附養濟院

留養局

漏澤園

地利不如人和子輿氏探本之論然未嘗不重築
鑿也安喜有故城邑城之建當在金改縣時建昌
之城自置鎮昉乎三屯之城於明始擴關隘諸城
由來殆久要以地居塞下故城池之防衛爲急至
於濟困澤枯諸惠政又愛人和衆之一端附載於
此有專城之責者尙其加之意焉

縣城

高三丈五尺周圍一千二百三十丈共計六里

卷之三
半有奇城內大街五中爲四面坊城外有南北關舊
本土垣高二丈一尺周五里許建築莫知所始明景
泰二年巡撫鄒公來學奉勅機縣贅以甌石學宮舊
在城外成化四年增築東城以包之舊止西南北三
門宏治十三年知縣張濟增築東門正德七年知縣
羅玉建北樓嘉靖十二年知縣許穉卿建南樓二十
六年知縣韋文英建東樓三十八年知縣羅鳳翔建
西樓城東北較卑隆慶元年知縣隋府增高一丈有
四隅有角鋪四面有腰鋪門樓設闔扁額東曰肅清
海濱南曰阜安嵐甸西曰夾輔神京北曰鎮靜邊陲

二十五年北門樓燬二十七年知縣錢吾德修甕城
三十年知縣張九三修北門樓崇禎十四年知縣高
承埏重修

國朝順治五年南樓燬知縣張玉重修康熙九年知縣
王永命修城建西門樓額曰屹然西鎮十九年知縣
張一諤修城東北隅三十餘丈五十七年知縣喬于
瀛修城垣及北門樓乾隆四十六年知縣喬鍾吳於
城陴樓堞之殘缺者悉加修葺改題東門曰豐樂西
曰阜安南曰惠甯北曰祺福同治元年署知縣方汝
翊修補北門甕城計三十餘丈同治七年署知縣胡

如川修理四城馬道以及門樓女牆凡殘缺處均修補完固

環城爲池深一丈廣三丈萬歷十二年知縣申安加以疏濬引河流環之四圍植柳順治五年知縣張玉復濬嗣皆頽圯迄今沙壅水涸疏濬維艱

明教諭張文明新增城記云遷安在漢爲令支在唐爲安喜迨明御世仍隸於右北平距邊陲僅四十里許昔值無事學宮尙建於東郭門外繼因變成化癸巳上命拓之城周垣東北隅獨卑隘弗類夫東北當建昌之衝嘉靖庚戌歲北邊有警舉邑懍懍莫不欲嚴整險峻以爲固守之具斯時雖各盡輸其財以助之不惜也甫平又苦其難而寢之己未歲晉蒲羅公鳳翔以名科尹茲土嘗以人和地利爲重見邊方不靖恒厯西顧之憂嗟爾衆曰民爲邦本城以衛民專城之命寄之於我而卑隘若此若不豫爲之所奚以

衛民而固本耶乃議增城事計長短則自東堤以抵西堞概有七十餘丈揣高低則接埭口與腰牆統有一丈二尺始得與而雉連互而齊等比議材費約甓灰若干以裕用約穀粟若干以食工因請裁於上報可又思增城者本以衛民也使盡民之力與民之財城雖高實爲厲階池雖深實爲陷阱以衛民者病民猶弗城也因自爲設處得甓三萬六千六百一十五數得灰三萬六千六百一十五斤仍謀捐俸以補其不足於時鄉士夫感義而動爭出其所有以自輸屈民之效義者亦然不旬日得甓以方計者四萬九千六百六十五灰以斤計者四萬九千九百三十五公又割俸資得菽粟以石計者十有三因命醫官徐良能以董厥事省祭姚仲進贊之公日省月試庶民樂役如子之來趨父事自七月九日癸酉卜吉鳩工迄十月二十八日辛卯三閱月而百雉雲興矣規制仍舊而壯麗有加匪惟足以慰王公設險之心而尤足以杜敵人窺伺之念公之軫念於茲其重負亦可以少紓矣鄉士夫梅如玉王涪父老李廷賓吳祥等欲

民德之謂之曰萊公柏蘇文忠公知杭時嘗葑田於湖民利之名之曰蘇公堤今明公之城萬世永賴其與城謝城齊城朔方無異遺愛甚大感於心而頌於口者安知遷邑之民無歸杭之民將效其譽二公者爲明公譽曰羅公城哉是爲記

邑令王承命修遷安縣城記云遷安距永平府四十里左環分水右據尖山灤河經南塞城倚北山川四固爲攸聚矣我

清混一區宇建極京師縣相距四百七十里實爲左輔要地余以康熙九年庚戌承乏茲土城垣摧圯雉堞崩頽門無鎖鑰之防民鮮安枕之樂不勝殷然念曰王公設險古志之矣城池所藉以相守者也今若此非惟無以壯觀內服威視遠方其謂吾民之保障何會奉道府檄倒塌城垣該地方官設法捐輸修理未及兩月而催修者凡五行乃集邑紳公議雖士民樂言捐助咸有費大貲細不易告竣之慮余則毅然以爲己任時當盛冬庀材候舉閒尋

聖駕

東巡奔走於橋梁供張而未遑也踰年春將有事城垣又有督修冷口邊城之役余思修理縣城令專責

也過此不修恐有不及修者矣遂詳報各憲衆心齊
驅併力合作經始於二月二十六日告竣於五月初
八日其間鼓衆勸徒殫財竭力爲時僅三閱月而報
大成者無一工之不舉不堅無一處之或漏或瑕也
噫此非吾民之樂於趨事而能過觀厥成乎因呼父
老而撫之曰城郭堅固外患可不生內奸可不作尙
其各和爾室家各睦爾鄉里敦樂土而勤本業庶幾
實符遷安之名而人安以拱翼我神京於無疆哉
計修倒塌城垣並垛牆二十一處共一百四十五丈
四尺造冊申送在案又未入報冊而修者係前令已
報修而未完則西面垛口二處計五十九丈一尺南
面垛口一十二處計三十四丈二尺外此而建城角
窩鋪立甕城內房設鎖鑰謹防禦以與民共休息焉
其捐輸姓名勒列左方以垂永久夫修葺城垣固令
分內事耳何謂是屑屑哉余於此殆有深慮焉念我
國家當承平之日而令有司完固城池古聖王安不怠
危之意也儻政之不修人將嗟怨城非民而誰與守
哉余又不禁念是役而兢兢云後之賢者侯茲土而
泄之以捍我城以撫我民相繼有加國之
慶也民之福也則又何可以無言是爲記

舊存守城熟鐵榔機一百七十五位

教場在西門外

內有演武廳久廢

營房在縣治北

今廢

養濟院在南關外房五間

留養所五處

一在縣南關一在建昌營一在喜峯口一在三屯營一在沙河驛原有勸捐銀二百

兩按月三分生息同治十二年秋知縣韓耀光又於南關之東偏增設留養所一處安置文流俾男女有

別焉

漏澤園三處

一在南門外地十畝知縣張濟建一在黃臺山地二十畝知縣張一諤建一在城東

大王家莊西

知縣王宏建

邑人劉鴻儒漏澤園記云古之仁人民吾同胞物吾
借與誠見夫天地為吾大父母人物異同共此一氣

而林林總總猶吾之伯叔兄弟支分而派遠者也是
故生必盡其養死必盡其情有知無知咸無失所而
後卽安此周禮所以有墓大夫之官西伯所以有瘞
骨之舉是皆大不忍於中而不得不爲之安頓措置
也而或者以爲不然謂生民之衆飢者欲食寒者欲
衣困者欲蘇勞者欲息此之弗恤而委骸朽骨之戚
戚得無緩急失倫乎故墓大夫今廢不存西伯之仁
瘞骨亦其餘耳然而識者必以恤死爲仁政卽當時
之頌西伯者亦必以澤及枯骨爲首稱抑又何說蓋
不忍之心有輕重長短死者如此生者可知已朽者
之不忍其暴露如此存活者之不忍其疾苦可知推
是心也凡所以利吾民撫吾衆惠我田疇益我子弟
者必無不委曲周詳者矣邑宰張公下車以來凡有
裨民生之事知周道濟未可更僕茲復捐貲置義冢
二十畝許於邑之南郭孤憐野鬼其無恫乎且此地
襟山帶河蘊靈凝秀眠牛臥馬天啟佳城葬於斯者
後將有昌大其門者矣張公之仁覆遷邑不獨顯在
目前且陰及千百年之遠山高水長曷其有極余故
樂爲之記以風

後之在位者

營寨關口城池

建昌營城縣北四十里輒城高三丈周圍四里許門三
曰東曰西曰南有月城有樓西便門四隅有角樓教
場在城西北

邑令靳榮藩遷安口號云舞彩歌扇話從前五十年
來禮教全學取唐風吟蟋蟀建昌已有武城絃自註
云建昌營素號繁華
今皆書聲絃歌矣

舊存熟鐵子母礮一位熟鐵礮二百二十三位又不
堪用熟鐵柳機五十二架百子銃十三門

徐流營城在縣東北五十五里石城高丈五尺周二百

六十二丈二尺東西南三門

河流堡城在縣東北五十里有城高丈七尺周二百二十四丈有奇門曰東曰南

羅家屯堡在縣西北五十里墳圯無存

五重安城在縣北四十里有城高丈五尺周百二十七丈五尺門曰西曰南

太平寨城在縣西北七十里亦曰太平營舊設太平路參將石城高二丈六尺周五百六丈六尺塹五十一

丈東西南門各有樓西山關北水關鐘鼓樓教場在

城南

戚繼光練武太平守將王君祿邀登南廟望北山古剎詩云憶昔從戎向北陲重來持節鬢成絲夜懸炎

海烽烟夢時聽巖關林杜詩古戍寒雲過鐵馬中原
晴日閃牙旗安危賴有諸君在醉酒還期下月支

上青山營城在縣西北一百一十里石城高二丈四尺
周二百三十一丈二尺門曰東曰西曰南

下青山營城在縣西北一百里石城高丈五尺周二百
四十三丈門曰東曰南曰北

爛柴溝城在縣西北一百里石城高丈四尺周百三十
丈三尺門在南

漢兒莊城在縣西北一百四十里土城高二丈周五百
二十六丈門三曰東曰西曰南教場在城東額設堪
用大小熟鐵礮九十九位

灤陽城在縣西北一百四十里土城高丈餘周六百丈

門三日東曰西曰南

以上二營爲三屯等營
兵赴三屯操練之所

三屯營城在縣西北一百二十里石城高三丈周圍七里門三東曰賓日西曰鞏京南曰景忠各有重城教場在城西

左營舊存熟鐵行營礮三十位滅賊熟鐵礮二位熟鐵威遠礮四位

右營舊存熟鐵九龍礮五位熟鐵馬蹏礮三十六位生鐵西洋礮四位神威卿礮四位熟鐵威遠礮一百六十八位熟鐵萬人敵礮二位

明總鎮戚繼光重修三屯營城記云國初捐大甯藩封界兀良哈爲屬夷賴陣輔郡莫重薊鎮未幾匪茹厘我宣廟出喜峯貢路征之而尙引外夷爲梗故初鎮桃林口移於獅子峪天順又移三屯營去喜峯二舍矣營曰三屯忠義衛三百戶屯地也屬遷安縣西百二十里左山海右居庸而綰轂其中以要貢路示重非擁武衛北城何以張形勢而抗威稜哉舊城卑薄而隘南有坳垣爲截殺營卽移鎮府所茨也二營間有闌闔每以無城戒暴客而屯戍非土著兩防空營以行雖名重鎮虛亦甚矣遵化縣去此五十里忠義三衛一所附之而此惟三百戶勢輕不足以犄角鎮府麾下移兵餉顧抱檄印於衛非所以尊統馭而急禦侮之完策也自嘉靖來夷震京國隆慶之元入薊東陞而是鎮益重次年乃以余總理之邊垣孔亟經營六年次第就緒內地賴以安堵二營闌闔日壯恐盜誨盜爲夷資雖增司守備非若軍衛可永賴而全鎮之衆常練於此弗足以容戍者病之矣乃謀闢城於制府劉公撫臺楊公當上卽位詔增飭邊城二公因得所請適少司馬汪公閱師而以移衛謀之公於元年條其便宜制以忠義中衛移之三屯城內其

掌印佐貳巡捕指揮及千戶經歷各一佩印赴之旗
軍春秋踐更而有警悉至遂置衛增營及繕建公署
百廢具舉舊城益不足以居之矣乃於二年秋規外
地而善其址三年楊公爲制府王公爲撫臺辛公爲
兵備胥襄工於三月撤南垣而環南營以圍之凡五
百五十七丈高二丈五尺加五尺爲雉堞而廣半於
高址廣四丈有餘門三南曰景忠東曰賓日西曰鞏
京其譙甚麗而闔次之徂暑外完秋登其裏上下有
埤以爲之防次年春二月乃繕舊城凡六百一十六
丈表裏高厚悉如新制冬而畢役正北爲重閣祀玄
武尤雄於麗譙角樓凡五麗視於闥舊東西重門於
上爲樓臺神祠下旁各有開便門周城水洞有二敵
臺有九環以牛馬牆列孔備睥睨東闕場以積茭藁
縱衡五十丈其北有聚星堂爲東路諸將所屬西則
闕武之場旁陞闢十丈長二百丈以益之其堂臺昔
卑陋余新建而高敞焉諸將之廳事有五兼之路西
來者蓋亦可寓矣前爲車營四百二十間凡制甚具
所費公帑僅六千餘金它皆操奇以佐之而城內外
所卹營房八百餘間若保河河南南兵輜重諸署及
守備司灤陽驛督府行臺城心撫松西南諸館旗纛

馬祖漢壽忠烈諸祠不出三年一切告成貢夷過者罔不驚異三軍呼曰壯哉城也足以衛衆矣或有疑其制多異而因軍正以請業已樂成則諗之曰凡堞戰格利用禦遠若鉤援薄其下而頰眦出擊爲艱乃於堞址亦創睥睨如懸半雷可藏身而頰擊水且從之下以外殺孔多勢分而注堅瀑落內則迤麗鱗次如級視彼內勢直而水專注其土善崩外因以傾者殊矣凡池有隍高而濶也其卑者爲濠塹故隍多復而險以夷乃因其勢淺七尺而深三丈其廣六七尺不等又以北川東走勢不環抱完固而於東門外下高就卑引以十丈湖其長三百五十餘丈深僅七尺以所出土築爲堤名曰孟堤者孟諸余別號也蒔以桃柳上下二梁以跨之堤之亭曰同春留土中爲亭名曰宛在取諸蒹葭環流植荷而爲將士休沐地或擊楫以遊焉湖曰震湖以在東方以取鎮胡其音同也凡邊障無北戶舊爲門三而已直北經涂有岑樓居鐘鼓金木相剋多水火災乃於北臺旁綴左右共制四室如城門狀及所塞舊門各虛其內如北制皆爲武庫以藏戎器簡書伍符避水火也又留舊南譙懸貢鼓岑樓獨懸景鐘踰通衢重關金革和鳴達於

四境登而眺之樓臺署廟聯以闐闐繡錯而翬飛謂之錦城可也嗟夫城制本繇以防水後用蓄衆乃藏竊聞之古人矣城者盛也所以盛衆也衆則益之不展曷以盛諸城者成也一成而不可毀也制未曲盡而孰保其毀乎故余九年於茲東控遼左西護陵寢爲臺一千二百有餘里凡五五標十五營皆爲保障計於以重封疆而衛社稷也茲奉制撫諸道之書幸有餘日及此敢不畢心力藉將校百執之勞而過觀厥成於重鎮乎凡我同事旣保我圉而無懼於鋒鏑則此亦可以忘勞矣軍正敬諾鐫之而示三軍且次執事於碑左俾來許之毋忘是勞者

戚繼光三屯新城工成志喜詩云受降新築壯三屯燈火遙連十萬村障燧層巒春作塞風雲大陸薊爲門東迴地軸山河固西擁天關宮闕尊百二城邊過質子千秋同戴漢家恩

顧炎武三屯管詩云三屯山勢鬱崢嶸少保當年此建旌名似北平臨宿將制如河上築降城忠祠日落來山鬼武庫苔封蝕禁兵一望幽燕人物盡頽垣荒草不勝情註云三忠祠在城南山上城西小門內有